


sukan



Pasukan Malaysia meraikan kemenangan apabila berjaya meraih empat pingat pada Kejohanan Skuasy Universiti Dunia



Muhammad Addeen Idrakie ketika beraksi pada Kejohanan Skuasy Universiti Dunia



Barisan atlet yang mewakili Malaysia bersama pingat masing-masing.

Malaysia cipta kejutan

Oleh Nor Azma Laila
norazma@bh.com.my

► **Bukit Jalil**

Pasukan Skuasy Universiti Malaysia menepati ramalan apabila berjaya merangkul dua pingat emas, satu perak dan satu gangsa di Kejohanan Skuasy Universiti Dunia Ke-9, yang berlangsung di sini, baru-baru ini.

Emas pertama negara disumbangkan oleh Low

Wee Wern bagi acara perseorangan wanita apabila berjaya menewaskan Tong Wing Tsz dari Hong Kong.

Seorang lagi pemain perseorangan wanita negara iaitu Nazihah Anis Abd Razak mendapat pingat gangsa.

Bagi kategori perseorangan lelaki, hasrat Malaysia untuk mendapat pingat emas lebur apabila Ivan Yuen Chi Wen tewas kepada pemain nombor satu Hong Kong iaitu Yip Fung Tsz (11-3, 11-9, 11-4) dan terpaksa akur untuk



→ **Kejayaan** kali ini adalah pencapaian terbaik pasukan skuasy negara dalam siri Kejohanan Skuasy Universiti Dunia.
→ **Antara** pemain yang mewakili negara Sanjay Chal Sing (UM), Muhammad Addeen Idrakie (UM), Ivan Yuen (UPM), Nazihah Abd Razak (KUIA), Low Wee Wern (KDU).

mendapat pingat perak buat kontinen Malaysia.

Saat bersejarah pasukan Malaysia dilakar bagi kategori berpasukan apabila mempamerkan aksi yang cukup bertenaga untuk menewaskan pasukan Hong Kong di pentas final.

Semangat juang tinggi
Meskipun begitu, kem negara dipaksa bekerja keras apabila Ivan Yuen tewas kepada Yip Fung Tsz sekali gus menghadiahkan mata pertama buat pasukan Hong Kong.

Perlawanan kedua menerusi perseorangan wanita, seperti dijangka, Low Wee Wern bangkit untuk menewaskan pemain Hong Kong sekaligus mengikat kedudukan dengan 1-1.

Bagi perlawanan penentuan, Sanjay yang juga pelajar Sarjana Muda Sains Sukan Universiti Malaya (UM) diberi tanggungjawab besar untuk membawa misi Emas Negara. Aksi yang cukup mencemaskan disajikan buat penonton apabila Sanjay tewas dua set berturut-turut iaitu

(4-11 dan 1-11) bagi set kedua dan ketiga kepada Wong Chi Him selepas berjaya menang pada set pertama dengan 11-8.

Namun berbekalkan semangat juang yang tinggi serta sorakan padu dari penyokong negara, Sanjay bangkit semula pada set keempat dan kelima untuk mencipta kemenangan (11-9 dan 11-7) sekali gus menjadi wira buat pasukan negara untuk memenangi pingat emas bagi acara berpasukan.